

## **Naija - Healin God Wod - Healing Scriptures**

**Matu 4:23,24 Jisos kon dey waka for Galili dey tish insaid dia sinagog. E prish abaut God Kindom and dey heal pipol wey get difren-difren diziz and siknes. 24 So di news abaut Jisos kon spread go evriwer for Syria. Dem kon bring pipol wey nor wel, wey nor fit waka, pipol wey devol dey wori and di pipol wey dim on dey insaid dem, kom mit am and e heal all of dem.**

**Matu 8:16,17 Wen evenin rish, dem bring meni pipol wey dimon dey insaid dem kom mit Jisos. E driv di wiked spirits komot kon heal all di pipol wey nor wel. 17 Dis won mak wetin Profet Isaia tok bi tru, "E rimov awa siknes and kari awa diziz komot"**

**Matu 9:35 Jisos waka go all di tawn and vilage, dey prish di Gud News abaut God Kindom for dia sinagog and dey heal difren diziz and siknes.**

**Matu 10:1 Jisos kol en twef disaipols kon giv dem pawa to driv dimons and heal all diziz and siknes.**

**Matu 10:8 "Mak una heal pipol wey nor wel, wak pipol wey don die, kior lepas and driv dimons komot from pipol bodi. Na fri God giv una dis pawa, so mak una gi-am fri to oda pipol tu.**

**Matu 11:5 "Blind pipol dey si, pipol wey nor fit waka dey waka, God dey kior lepa, deaf pipol dey hear, pipol wey don die dey wak-up and poor pipol dey hear di Gud News. (Isaia 35:5)**

**Matu 12:15 Wen Jisos hear sey dem dey plan to kil-am, e kon komot from der. Meni pipol folo am and e kon heal all of dem wey nor wel.**

**Matu 15:30 Meni pipol kon kari pipol wey nor fit waka, blind, paralaiz, dumb and odas wey get difren siknes kom en front and e heal all of dem.**

**Matu 17:20 Jisos ansa dem, "Na bikos una fate tu smol and I tel una tru wod, 'If una get fate wey smol laik mustard sid, una go tel dis mountin, "Mak yu move from here go yonda" and e go move and nortin go hard una to du.**

**Mark 1:34 So, Jisos heal meni pipol wey nor wel wit difren-difren diziz and e driv meni dimon komot from pipol bodi. Bot e nor let di dimons tok, bikos dem no hu e bi.**

**Mark 3:10 Jisos kon heal meni pipol, so all di pipol wey nor wel kon dey push ish oda, so dat dem go fit tosh am.**

**Mark 3:14,15 Jisos klimb go on-top mountin kon kol di pipol wey e wont, mak dem kom mit am for der. 14 E kon shuz twef (wey e kol apostols), so**

**dat dem go dey wit am and e go fit send dem go prish.**

**Mark 6:5,6 Jisos nor fit doh eni mirakol for der, so e onli tosh som sik pipol kon heal dem. 6 Jisos sopraiz, bikos dem nor biliv am. So e komot from der go oda vilage wey near der kon tish dem.**

**Mark 6:13 Dem driv meni dimon komot from pipol bodi and pour oil for meni pipol wey nor wel head kon heal dem.**

**Mark 6:55,56 Di pipol run pas all di aria, kari di pipol wey nor wel for mat go wer dem hear sey Jisos dey. 56 Eniwer wey Jisos go, weda na vilage or tawn or farm, dem go kari di pipol wey nor wel for dia market place kon ask Jisos weda dem go fit tosh en klot and evribodi wey tosh am, kon wel.**

**Mark 8:23-25 E hol di man for hand kon tak am go outsaid di vilage. Jisos spit for di man eye kon tosh am, den ask am, "Yu dey si enitin?" 24 Di man luk up kon sey, "Yes, I dey si pipol, bot dem bi laik tri wey dey waka abaut." 25 Jisos tosh di man eye again. Di man eye kon opun and e kon dey si wel-wel.**

**Mark 9:29 Jisos ansa dem, "Na onli wit praya and fastin dis kaind won dey tak komot."**

**Mark 16:17,18 "Dis signs go folo pipol wey biliv: Wit my name, dem go driv dimon komot from pipol bodi; dem go speak new language wey dem nor learn; 18 dem go fit hol snake and if dem drink poison, e nor go du dem enitin; dem go put dia hand for sik pipol bodi and di pipol go wel."**

**Luk 4:18 "God Spirit dey my bodi, bikos E don anoint mi mak I prish Gud News giv poor pipol. E send mi mak I prish fridom giv pipol wey dey prizin and mak blind pipol for si. E stil sey mak I fri doz wey dem dey opres**

**Luk 4:40 As day dey dak, evribodi wey get pipol wey nor wel kon bring dem kom mit Jisos. E tosh dem for head and dem kon wel.**

**Luk 5:15 Bot di news abaut Jisos kon spread pas bifor and meni pipol kom mit am mak dem for fit hear en wod and mak e for heal dem.**

**Luk 5:17-25 Won day, wen Jisos dey tish, som Farisi pipol and di law tishas kon kom from all di vilage wey dey Galili, Judea and Jerusalem, dem sidan near Jisos and God pawa dey wit am to heal pipol. 18 Som men kari won man for bed wey nor fit waka, kom. Dem kon dey trai to kari am enta di haus kom mit Jisos, 19 bot bikos pipol meni, dem nor fit kari am pas, so dem kon opun di zink for di haus top, drop di man wit di bed smol-smol, til e rish Jisos front for di pipol senta. 20 Wen Jisos si haw dia fate big rish, e kon tel di man, "My frend, I forgiv yu all yor sins." 21 So di law tishas and di Farisi pipol kon dey tink for dia maind sey, "Hu bi**

**dis man wey dey shalenge God laik dis? Hu fit forgiv sin esep God?" 22 Jisos no wetin dem dey tink, so e ask dem, "Why una dey tink laik dis sef? 23 "Wish won eazi to tok? 'I forgiv yu yor sin?' or 'Get up mak yu waka?' 24 "Bot mak una for nosey Man Pikin get pawa for dis wold to forgiv sin, e kon tel di man wey nor fit waka, 'I tel yu, get up, kari yor bed mak yu dey go haus.'" 25 At wons, di man kon get up for dia present, kari di bed wey e laidan put bifor kon dey praiz God as e dey go haus.**

**Luk 6:17-19 Den Jisos kom dan wit en apostols kon stand for groun wey level. Meni disaipols from Judea, Jerusalem and all di smol tawns wey near Tyre and Sidon gada kon hear am dey prish and e heal doz wey nor wel 18 and odas wey evil spirit dey wori. 19 Evribodi dey trai to tosh am, bikos pawa wey dey komot from en bodi, dey heal pipol.**

**Luk 7:21,22 For dat same taim, Jisos heal meni pipol wey get difren siknes, pipol wey get evil spirit and pipol wey nor fit si, kon dey si. 22 So, Jisos ansa dem, mak una go tel Jon wetin una don si and hear: "Blind pipol dey si, pipol wey nor fit waka bifor, dey waka, pipol wey get leprosi, dia bodi don klin, pipol wey nor dey hear, don dey hear naw, pipol wey don die, don wak-up and ivun poor pipol, don hear di Gud News.**

**Luk 8:2 and som wimen wey Jisos driv evil spirit and difren siknes komot for dia bodi, go wit am: Mary (wey dem dey kol Magdalene), wey Jisos driv sevun dimon komot for en bodi,**

**Luk 9:2 Den e kon send dem go prish abaut God Kindom and heal pipol wey nor wel.**

**Luk 9:11 Bot wen pipol no, dem kon folo Jisos and en disaipols go der. E welkom dem, den tel dem abaut God Kindom and e heal doz wey nor wel.**

**Luk 13:12 Wen Jisos si-am, e kol di wuman kon tel am, "Wuman, yu don fri from yor trobol."**

**Luk 13:32 Bot Jisos tel dem, "Mak una go mit dat yeye man tel am, 'Si, for today, tomoro and next tomoro, I go stil dey driv dimons dey heal pipol, ontil my wok go finish.**

**Jon 5:8,14 Jisos tel am, "Mak yu get up! Kari yor mat mak yu bigin waka." 14 Afta dis, Jisos kon si di man insaid di Tempol. So e kon tel am, "Luk, yu don wel naw, mak yu nor komit sin again, oda-wise, di tin wey bad pas wetin du yu bifor, go hapun to yu."**

**Jon 14:12 "I tel una tru wod, di pesin wey biliv mi, go du di kaind mirakol wey I dey du and e go ivun du di wons wey big pas dem, bikos I dey go mit my Papa.**

**Apostols 3:6 Pita kon tel am, "I nor get silva or gold to giv yu: bot na wetin I get, I go giv yu. Wit Jisos Kraist name wey kom from Nazaret, stand-up**

**mak yu begin waka!"**

**Apostols 5:15,16 sotey dem ivun dey kari sik pipol put for bed and mat for road, so dat as Pita dey pas, en shadow go heal dem. 16 Dem bring sik pipol and doz wey get evil spirit from all di tawns and vilage wey near Jerusalem and God heal all of dem.**

**Apostols 10:38 Jisos Kraist wey kom from Nazaret, na-im God giv di Holi Spirit and pawa. Haw e kon du gud for evriwer kon heal pipol wey devol dey opres, bikos God dey wit am.**

**Apostols 19:11,12 Dat taim, God yuz Pol dey du meni wondaful mirakols, 12 ivun handkachef and klot wey dem tak tosh Pol bodi, dey heal sik pipol and driv evil spirit from pipol bodi, wen dem yuz am tosh dem.**

**Roman 8:26 Na so tu di Holi Spirit dey help us bikos wi dey wik. Bikos wi nor no wetin wi sopoz to pray for, di Spirit by ensef dey krai beg God, for di way awa wod nor go fit esplain.**

**1 Fest Korintians 12:9 To oda pipol, di same Spirit dey giv dem fate or di pawa to heal sik pipol.**

**1 Fest Korintians 12:28 So for di shosh, God first shuz apostols, bifor profets and tishas. E stil shuz som wey dey du mirakol, odas wey dey heal sik pipol, som wey bi lidas and odas wey dey tok wit difren-difren language.**

**Filipian 2:27 E sik wel-wel sotey e nearli die. Bot God get mesi for am; nor bi onli for am, bot for mi tu, so dat I nor go krai join di won wey I dey so.**

**James 5:14 If eni of una nor wel, mak e kol di eldas for di shosh, mak dem pray and yuz oil anoint am for Jisos name.**

**1 Fest Pita 2:24 E kari awa sin for kros, so dat wi go stop to sin and dey du gud for God eye. "Na di wound wey dem wound am, naim mak us wel." (Isaia 53:5)**

**3 Ted Jon 1:2 My frend, I dey pray sey mak evritin dey gud for yu and mak yor bodi wel, jos as yor soul wel tu.**

**Exodus 15:26; Deuteronomy 7:15 not get diziz of Egypt.**

**Isaia 58:8 God heal spedi.**

**Jeremia 30:17; Jeremiah 33:6 God heal.**